

Date – 03/07/2026

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Thu dik tawklo leh documents lem hmanga Goods and Services Tax(GST) registration dil an awm tih hmuhchhuah a ni.
2. India Meteorological Department (IMD) Aizawl in ruahtui tlak dan data a tihchhuahah Mizoram pumah nikum aiin kuminah ruahtui a tla tlem zawk.
3. Prime Minister Narendra Modia chuan Amarnath Yatra chu thlarau nuna chatuan daih zirlai anih thu sawiin ramchhunga hnam ziarang inpumkhat tirtu a ni a ti
4. India chuan Venezuela lirngching tuarte chhawmdawl nan Operation Amistad hnuaiah bungraw tam tak a thawnlut..

<><><>

GST

Thu dik tawklo leh documents lem hmanga Goods and Services Tax(GST) registration dil an awm tih hmuhchhuah a ni.

Mizoram Sawrkar hnuaia Taxation Department officer-ten risk-based scrutiny, data analysis leh physical verification an kalpui mek atangin GST registration dilna thenkhatte chu thu dik tawklo leh document lem hmanga dil an ni tih hmuchhuah a ni a,

Registration diltu thenkhatte chu an sumdawnna hmun anga an sawiah hmuh tur an awm lova, an dilnaa document an thehluhte pawh finfiah theih a ni lo tih hmuhchhuak in , dilna thenkhatah phei chuan in leh dawr luah tur neitute hriat miah lohvin an hming hmangin dilna an lo thehlut thin tih an hmuchhuak tih an thuchhuah a tarlan a ni.

Mizoram Goods and Services Tax Act, 2017 dan in a sawi angin hmalak dan tur ngaihtuah mek a nih thu tarlang in mipuite, in neitute leh sumdawnna kalpuitute chu an identity document, an address, an mobile number, an e-mail address leh an personal information dangte GST registration atan emaw, sumdawnna dang atan emaw hmangtura dil an nih pawhin lo hmantir phal lo turin Taxation Department chuan mipuite a ngen a ni.



PANCHAYATI RAJ NATIONAL WORKSHOP

New Delhi-ah Village Council/Panchayati Raj te tan a Finance Commission 16-na rawtna te vawiin khan sawiho a ni a, na neih a ni a. Union Minister of Panchayati Raj Pu Rajiv Ranjan Singh hoa neih he programme-ah hian Rural Development and Administration Department Minister Prof Lalnilawma chu telin, 16th Finance Commission hnuai atanga Rural Local Bodies (RLB) tena sum an hmuh dan tur sawiho a ni.

He sawihonaah hian Prof Lalnilawma chuan RLB Performance Grant leh State Performance Grant te tha taka Mizoramin a hmuh theih nan tihtur bituktheihtawpa tihhlawhtlin an tum thu te, Own Source Revenue ah pawh Mizorama Village Council te chu nasa leh zuala thuam chak an nih mek thu te, Own Source Revenue atanga chhiah hrang hrang online a lakna SAMARTH Panchayat Portal pawh hmang tura Mizoram a in puahchah mek thu a sawi a. Gram Panchayat Development Plan (GPDP) atanga VB-G RAM G, SBM-G leh Scheme dangte nena nasa zawka convergence kalpui a nih mek thu te a sawi bawk.

Prof Lalnilawma chuan Ministry of Panchayati Raj in Finance Commission 15-na hnuai Mizoram in RLB tana sum a hmuh tur zawng zawng nikum Financial Year ah Mizoram in a hmuh kim avangin lawmthu sawiin, thingtlang ah hmasawnna hna tha tak tak thawh a nih theih phah thu a sawi tel a. Finance Commission 16-na hnuai atangin Mizoram sawrkar chuan thingtlang hmasawnna dik leh felfai zawk nen a Viksit Bharat @2047 an thlen ngei a beisei thu a sawi bawk.



FLORIST COLD STORAGE

Aizawl Chaltlang Dawrkawna Multi-utility Centre-ah Mizoram Florist Association te hman tur Cold Storage - Horticulture Deppt DirectorPu CH Lalmuanpuia’n a hawng .

Pu CH Lalmuanpuia handholding thupuia neiin hma lak zel a ni a, chutah chuan florist te hi an tel vek a ti a. Sawrkar chuan scheme tha tak tak a siam chho zela -Fair te an nei ho thin a, mipui leh pangpar chingtuten hlawkna tam tak an nei thin thu sawiin, kut hnathawktute an thil thar leh pho chhuah thinte chu ramchhung mite bakah rampawn lam atangin ngaihhlut a hlawh em em a ni a ti a, Floriculture industry hi sorkar laipuiin hmeichhiate chawikanna tura hma a lakna nen a inzawm avangin hmasawn turin hmalak dan kawng zawn zel a ni dawn tih sawi bawk .

VC

Cold Storage hmunah hian engtiklai pawhin pangpar tharlam, Mizoram a tharchhuah leittheihin a awm a, chhiatni/thatni mai bakah , Biak In leh hmundang cheimawi thin ten , an mamawh te an lei thei tawh dawn a, bouquet leh flower basket leh a dangte mamawh tan pawh Chaltlang Bazar chhawng hnuai berah a order theih a, Cold Storage-ah hian bungrua ton 6.5 a leng bawk a ni.



NNS REFRESHER COURSE

India dan thar pathum (Naveen Nyaya Sanhita)- Bharatiya Nyaya Sanhita, Bharatiya Nagarik Suraksha Sanhita leh Bharatiya Sakshya Adhiniyam chungchang zirhona 'State Level Conference-cum-Joint Refresher Course' chu vawiin khan Mizoram Sawrkar, Mizoram State Legal Services Authority (MSLSA) leh Judicial Academy, Assam tangkawpte chuan Aijal Club-ah an buatsaih.

He hun hmanpuitu Home Minister Pu K.Sapdanga chuan hun inher chho zêlah organized crime leh technology hmanga thil sual tihna a pun zel avangin, India dan thar pathumte chu mipuite ngai pawimawh lehzual zawk, rang zawka che chhuak thei, hun mamawh ang zela hmasawna ruhrel leh theihna tihpun nan, science leh technology hman tangkai lehzual nan leh tunlai khawtlang mamawh phuhhrûkna turin India ram chung criminal justice system siamthatna tura duan a ni, a ti a. Amaherawhchu, Minister chuan dan siamthat hlawhtlinna chu mipui leh dan kengkawhtuten Naveen Nyaya Sanhita an hriatthiam dan leh kenkawh anih danah a innghat a ni tih sawiin, kalkhawmte chu vawiin programme hi hlawk leh tangkai taka hmang turin leh criminal justice system tihchakna kawngah an thawhhlawk lehzual a, mipuite chanvo leh dikna an humhalh theih zel nan duhsakna a hlan a hlan a ni.

He hunah hian General Administration Department-a Executive Magistrate-te, Guwahati High Court Aizawl Bench-a Judicial Officer-te, National Informatics Centre official-te, Government Advocate-te bakah Home, Health & Family Welfare leh L&J Department-a official thawkte thahnem tak an tel a ni.

<><><>

IMD WEATHER

Indian Meteorological Department (IMD) Aizawl in ruahtui tlak dan data a tihchhuahah Mizoram pumah nikum aiin kuminah ruahtui a tla tlem zawk.

IMD Aizawl Director Sudheer Kumar Dwivedi hnen atanga thu dawn danin, District hrang hrangah March leh April thla chhung khan Mizoram hmun hrang hrangah ruahtui a tla tam a, a bik takin Aizawl leh Kolasib-ah ruahtui a tla tam hle a, Lawngtlai, Serchhip leh Mamit-ah te pawh ruahtui a tam hle a. May leh June thla chhung erawh district tam takah ruahtui a tla tlem a, kum 2025-a ruahtui tlak zat khaikhinin kumin hian Kolasib, Hnahthial, Champhai leh Siaha-ah a tla tlem hle a ni.

District zawng zawng zingah Aizawl-ah June thla khan ruahtui tla tam ber niin 358.6 mm a ni a, Lawngtlai leh Serchhip pawh nikum aiin kumin hian ruahtui a tla tam zawk a ni. Fur a la nih chho dawn a, ruahtui tlak dan erawh a la danglam thei a ni.

IMD Aizawl Director chuan ruahtui tlak dan enin, ruah leh thli lakah mipuite fimkhur tur in a chah a, hmun hlahawma leh leimin theihna hmuna chengte chu fimkhur turin a chah a ni.

<><><>

MPCC

Mizoram Pradesh Congress Committee MPCC President Pu Lal Thanzara chuan sorkarin Mizoram Agricultural Marketing & Construction Corporation

Limited (MAMCO) hnenah School 60 lawih sakna tur a pe ngawt mai chu an thlir mek a ti.

Vawiin khan Congress Bhavan Golden Hall ah 'Political Session' hmangin, heta thusawitu Lal Thanzara chuan Rorel lai party chuan tunah hian PWD in open tender a hnathawh tur an chhuahna chu CM in a cancel tir leh a, departmental a thawk tura ruahmanna a siamtir mek niin an hria a ti a. Party dang an thlir chuan an party chhuahsana va awmna tur itawm tak an awm chuang em ni a ti.

Pu Lal Thanzara chuan, Remna Ni lawmnaah mi tam tak chuan Pu Lal Thanhawla hming lam rik te an hreh viau laiin Home Minister Pu K. Sapdanga chuan, MNF te remna siam tura ralthuam tunga lo penchhuak te chungah lawmthu a sawi a. An lo penchhuahna kawnga kawng lo siamsaktu Pu Lal Thanhawla inpekna kha a chawimawi nawn leh tih a sawi chu lawmawm a ti a, Political Session kaltlangin Home Minister hnenah lawmthu a sawi duh a ti.

Mipui nawlpuiin an hriatchian si loh, hun a kal anga, harsatna namenlo thlentur tur tam tak chu BJP ten an kalpui mek zel ni a sawiin, hengte hi Congress ten an ngaihshawha an tlangau zel loh chuan ZPM leh MNF ten an tlangaupui ngam a ring lo a ti a, ram, hnam leh sakhua him nan Central ah leh Mizoram-ah Congress a sorkar a ngai a ti bawk.

<><><>

BJP

BJP State Core Group Member Pu K. Hrahmo, MLA chuan Mizoram mipuiin ZPM a Sorkar tir chhan chu Joshua enchhin an duh vang ni lovin, Mosia zawk a ni an thlan tlin chhan a ti.

Vawiina Friday Political Session, BJP Mizoram State Office, Mipui Rûn, Upper Republic-a an neihah thusawiin Pu Hrahmo chuan ZPM chhungkua-a buaina awm anga an sawi fo chu pawn lam atangin engmah hriat a ni lova, Party chhungkaw thil a nih avangin Party dangte chuan sawi tur an nei lo tih sawiin mipuiin an thlan tlin chhan erawh Joshua enchhin an duh vang ni lovin, Mosia zawk a ni an thlan tlin chhan a ti.

BJP din a nih hma khan Congress Party hunlai khan Anti-Conversion Law, Sakhaw danga inleh khapna dan kha , State pathum (3) Odisha, Madhya Pradesh leh Arunachal Pradesh-te chuan an State tan lo pass tawhin Congress Party te chuan BJP beih nan an hmanh leh fo thin in mizo mipuite hnenah thu dik tawh lo an thehdarh nasa hle a ti a, Anti-Conversion Law hi State list a nih avangin State thenkhat chuan an State Assembly-ah an pass ve leh bawk a. Anti-Conversion Law hian sakhaw danga inlehna hrim hrim a do a lova, dan hnuaiah felfai taka an inleh a phal thung a,nimahsela Mizo mipuite'n BJP tih chhuah ang hrima an ngaihna chu a dik lo hle a, a bul tumtu chu Congress Party an ni tih hriat a ngai zawk a ni, a ti.

Mizo mipuite hian thudik hriat chian tum hmasa ngai lo tih sawiin Pu Hrahmo chuan Delhi atanga thutlukna siam a nih thin vang ringawt a , engamah hmaa lo do leh ngawt thin chuan anb ngaihtuah chian loh zia leh thudik hre tura an inzir peih loh zia a tilang Chiang a ti a, Mizoram hi thangtharten an kaihhruai hun chuan changkanna kawngah chak takin a kal theih tur thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



PM MODI ON AMARNATH YATRA

Prime Minister Narendra Modia chuan Amarnath Yatra chu thlarau nuna chatuan daih zirlai anih thu sawiin ramchhunga hnam ziarang inpumkhat tirtu a ni a ti. Tukin atang khan ramchhunga sakhaw biak zin hunpui Shri Amarnath Yatra chu tan a ni a. Mi sang telin he hunah sakhaw biak zina tel tur hian Jammu and Kashmir an pankhawm a. Pu Modia chuan Amarnath Yatra hmang tura inbuatsaih zawng zawngte duhsakna a hlan a. Faina leh thianghlimna ngai paiwmawh tura chahin an himna tura kaihhruaina te ngai pawimawh turin a chah bawk.

Amarnath Yatra-ah hian Jammu atanga chhuakin tlang chhengchhe tak tak paltlangin Amarnath Temple ah Shiva malsawmna an dil dawn a ni.



OPERATION AMISTAD

India chuan Venezuela lirnghing tuarte chhawmdawl nan Operation Amistad hnuaiah bungraw tam tak a thaawnlut. Union Ministry of External Affairs chuan hemi chungchang hi social media lamah tarlangin Army Field Hospital te chaun Venezuela ah hian enkawlna chi hrang hrang an pe a. Hetianga hmalakna avang hian India chuan fak a hlawh hle niin Venezuela-a Indian Embassy chuan a sawi a ni.

Venezuela President lailawk Delcy Rodriguez chuan ni 7 chhung lirnghing avanga thite sun anih tur thu a puang a. Hriat theih chinah June ni 24 a lirnghingah khan mi 2595 an thi a. Mi sing khat sang hnih chuangin hlaim an tuar a. Chenna in 189 chuang a chhia a ni.

